

寶奎堂集

古之文章其能傳之不朽者類皆遭際盛世君明臣良  
得以雍容揄揚論述功德發明惇大之業推闡神聖之  
心垂諸千秋與詩書相表裏夫是故西京之體爲可貴  
也沿及後世文日卑弱好奇之士往往么韻孤絃別求  
傳世行遠之作而轉視古人沈博絕麗者爲靡曼不足  
爲一旦朝廷有大著作至于使命急宣乃局縮無可應  
惟刺取依樣葫蘆之語以爲常格如是此廬陵謂翰林  
無文章蓋不自今日始矣耳山先生由部郎改官詞館  
以文學受

寶奎堂集  
特達之知疊荷

聖恩晉階卿貳凡有經進之作莫不

嘉獎備至賚予駢蕃論者竊謂爲人臣子遭際如此豈  
非異數而不知其所以契合

上心者無他惟立言之得體也昔明宋景濂參侍講幄  
凡詔誥賦頌多經其撰述嘗賜宴禁中天子至親賦醉  
學士歌以寵之今先生在翰林時自奉

旨纂輯各書外其制草及一切典禮諸章奏皆出其手

歲首

重華宮小宴

召入聯句

賜如意畫軸以爲常是先生之著作與景濂同卽先生之榮遇亦無不與景濂同然則景濂開有明一代文章之運者先生又何不可爲

本朝之冠冕哉先生少穎悟讀書一過不忘撰文亦不假思索大率蘊蓄于中而騰躍于外故其氣宏深而博大其辭藻耀而高翔卽其使館往來賓筵酬贈隨作隨棄而吉光片羽流落人間亦自有冲和粹美氣象余讀

寶奎堂文集竊歎先生已往而光景常新然後知文章  
自有道也余在京師辱先生下交與之言恆訥然不出  
于口及其縱論古今水利兵刑食貨諸大事數其利弊  
又如掌上螺紋始知其經濟之大非可獨于文字求之  
然卽以文字論固已自有不朽在若余者叨隨詞苑幾  
三十年其間凡四掌應奉文字而拘牽常格無所短長  
每憶先生酒坐之談真覺立咫尺焉而汗浹襟也

嘉慶甲子秋八月錢唐後學吳錫麒拜撰

耳山先生以著作才受知

高廟殊恩異數冠絕一時中年益有志經世之學乾隆五十七年以副憲董校奉天遽卒于役未克大竟其居世爭惜焉 外大父王蘭泉先生爲作墓碑詳述生平并敘交契甚厚以時考之 先大父愛亭公同在詞館當亦有交誼余生也晚未獲知其梗概 先生文詩若干首自奏牘以及酬答莫不備具其體裁足爲圭臬而忠愛惓惓尤令讀者想見其爲人至襄定四庫全書及

奉

勅編輯者度于

中秘昭示來茲尤足以垂不朽嘉慶十五年喆嗣慶循  
刊寶奎堂集篁村集藏于家旋以海疆不靖板燬于火  
道光二十八年余建藩于豫哲孫成沅爲臬司李懼其  
遺澤將湮就行篋所攜原集謀復刊刻遵先志也夫爲  
人孫子者先人有美而弗彰不可謂之孝今司李刊先  
人之集其欲紹先人之業以補所未竟厥志殆未可量  
也司李勉乎哉今年冬以集見示且請序于余適余方  
哀輯 先大父愛亭公遺稿付梓因其有同志也遂綴

數語于簡端

道光二十九年仲冬朔

賜進士出身護理河南巡撫河南布政使司前翰林院  
編修館晚生嚴良訓謹序



昔寶鼎告重熙之瑞司馬陳盛藻於漢京介珪昭邺治  
之符令狐輯長編於唐室厥後子元在官史通用簪君  
實視事書局自隨後人豔其遇天下誦其書藝府望尊  
才流宗仰副憲耳山先生根情苗言華聲實義意密  
理粹致遠氣高游河上溯

堯年章成畫日絕越載爾禹蹟賦奏淩雲於是薇省影  
纓槐廳珥筆口吐瓊書名高於鸞掖手揮霄翰譽播於  
雞林輕縑素練之章瓊尊玉杯之貴星舒雲布錦繁珠  
零金壺乍瀉卽墜青泥琅簡新揮總疑素構與河間相

國金版親歿玉箱共領柳蚪蜚聲於北府裴諷競譽於  
南省以一躍十駕之才正五方八體之繆用一揮九制  
之敏擷四部六錄之華凡若劉略班藝虞志荀錄彙其  
叢殘新其良朽蠶出者沙汰蟬斷者補苴考訂亡逸赤  
軸紛羅研覈異同黃墨精謹鳩集維勤不遺玉屑龍章  
丕煥大啟珠叢提要一書抗名百世息乎棘寺分司柏  
臺建績猶念書藏宛委魚豕易譌何期記讀瑯嬛龍蛇  
遇厄窮陰躔度瀋陽首塗積雪沍寒譽星揜曜騰帙所  
畱鼎彝並肅儆覆轍於古今則撰列朝之史記棧車於

嶺海則考勝國之蹤爲發幽光則大節炳於緇素能稽  
殊俗則異聞識自契丹溯黃龍丹鳳以還問官則詳九  
級增蒼隼青蛇之飾通志則載八旗聞攷京師三輔兼  
搜其迹藁脩居正五代亦補其篇張侯遜此窺原紀勝  
更逾蔥嶺元相存其少作編年復系篁村領辯悟異縹  
句雕章輝煥炳蔚恢廓閑雅金絲互引玉石均調所以  
激清風於八閩傳鉅製於四譯聆震雷之迅發景濃雲  
之鬱興朝野望風山川增色袁翻變色於那穎李白低  
首於宣城不徒泉頌雙龍谷記千蠋矣又能鎡然自卑

怕焉若恤扼歆毋失縉紉不移炳燭不忘於垂暮劬書  
卓越於當時擁旄三葉履操不異夫儒生清第百年誦  
芬有待夫孫子芷泉司理篤念詒謀重哀遺集公續渡  
江之後代顯國華士衡入洛之年先陳世澤守之於烽  
燧驚心之後朶之於簿書鞅掌之餘以視詩編摩詰敬  
念諸兄集著歐陽成由令子今之準昔尤有難焉長贊  
後進叨陪前塵夙企瞻星氣而輝流翰苑願表忠宣奏  
議之遺采風詩而近接麀孫兼志河雒同官之雅

道光二十有九年歲在屠維作噩陽月大興後學俞長

贊拜序

國家當重熙累洽治化光昭其時必有駿偉非常之彥  
應景運以發揚盛烈班揚歌頌燕許文章所由與詩書  
相表裏而光燄所在亦斷不與蠹簡殘編同其湮沒者  
誠有以呵護之也道光丁未冬爾墉由京師來主彝山  
講席始與司理陸君芷泉班荆道故旣而出耳山先  
生寶奎堂遺集見示讀至半乃作而歎曰我

朝受

命有天下盛德大業遂古罕疇

高廟御宇六十年奮武揆文炳耀史冊復開四庫全書

館絜三古滙九流凡芝殿蘭臺及山岩屋壁之書無不  
舊萃六幕同文非有劉向曾鞏之材不足以光藝苑而  
垂令典 先生與河間紀尙書同被

特簡值古今未有之遇讀古今未見之書所作全書提  
要亦創古今未成之業猗歟盛哉爾壙生晚側聞父師  
緒論私淑 先生于數十年以前真如太山北斗顧終  
以未讀 先生全集爲憾今誦遺編庶稍快生平之向  
往矣司理俯仰一官守茲集如天球圖壁出倖鐫板以  
惠士林 先生文章與氣運相感通天下汲古敏脩之

士自有藏名山秘枕中以流傳之者固非一時兵燹所能操廢興之權況又得賢子孫如司理者乎顧先生官通顯進御文字與友朋唱和流連山川所作必繁富爾壩舊藏先生題畫詩手蹟亦亟錄付刊雖所補僅止一篇而先生默相之應異日必有繼爾壩以副司理之心者固可券也

道光二十九年十月後學浙西周爾壩謹序



芷泉司理重刻其 先祖副憲公寶奎堂遺槁竟請敘  
于芬芬也何敢敘 公之集然竊惟 公與 先曾祖  
司寇公爲同年進士又與 先曾伯祖中丞公交集中  
有投贈諸詩時 先曾伯祖方開府武昌 公有粵東  
之行中道而返詩卽經武昌時所投贈者也未有話到  
脊令原上草涕痕重爲小中丞之句蓋 先高祖恭定  
公暨 先曾伯祖 先曾祖相繼官巡撫世故以大小  
二中丞別之小中丞謂 先曾祖也是時 先曾祖已  
捐館舍矣烏乎 公之詩可謂纏綿悱惻哀惋切摯凡

在讀之者無不知 公性情之篤吾兩家交誼之厚況  
在所施者之子孫有不油然而生感情焉雪涕者乎如是  
則芬卽不文安可不敘 公之集矧重之以司理同官  
之雅殷勤之請于是銳欲屬橐而倥傯鮮暇也適奉  
恩命擢藩畿輔不日將與司理別矣遂書曩事而歸之  
有以見吾兩家先世交契之淵源吾兩人離合之蹤跡  
俾後之子孫有所考而勿忘焉若夫 公之通材碩學  
鴻篇鉅製固已麗篆縹緗黼黻宇宙世之讀公集者皆  
能言之無俟芬贅一言以爲輕重也烏乎若司理之不

忘先澤亟亟焉抱遺集以刊之可謂孝思不匱永錫爾  
類芬視之有愧矣承先啟後之規不於此見之哉道光  
二十九年九月海豐後學吳式芬謹序

誥授通奉大夫都察院左副都御史陸公墓誌銘

青浦王昶撰

洪惟我

國家重熙累洽百數十載蘭臺石室所儲光燭雲漢而  
皇上稽古典學復開四庫全書之館用惠藝林先取翰  
林院所弄永樂大典錄其未經見者又求遺書於天下  
書至今仿劉向曾鞏之例作提要載於卷首而特

命陸公錫熊偕紀君昀任之公考字畫之譌者卷帙之  
脫落者篇第之倒置與他本之互異是否不謬於聖人

及鼂公武陳振孫諸人議論之不同總撰人之生平撮  
全書之大概凡十年書成論者謂公之功爲最多公諱  
錫熊字健男一字耳山乾隆二十四年己卯舉於鄉二  
十六年辛巳成進士二十七年春恭遇南巡獻賦  
行在

召試入一等

賜內閣中書舍人旋充方略館纂修官時方奉

勅修通鑑綱目輯覽編撰以進當

上意遂進直軍機處三十三年十二月遷宗人府主事

繼擢刑部員外郎進郎中三十八年八月以撰提要稱  
旨改授翰林院侍讀四十年二月授右春坊右庶子未  
幾擢侍讀學士閏十月充

日講起居注官又充文淵閣直閣事四十二年春

孝聖憲皇后賓天凡大祭殷奠上

尊謚典禮嚴重應奉文字大學士于文襄公屬公撰進  
皆被

俞允四十五年六月授光祿寺卿四十七年五月授大  
理寺卿五十一年十二月提督福建學政五十二年二

月授都察院左副都御史仍留學政任以五十五年春  
任畢旋京先是四庫全書之成也公任編輯不任校勘  
而

上命分寫七分自

大內文淵閣外

圓明園之文源閣熱河

避暑山莊之文津閣

盛京之文溯閣各虔一部又於揚州大觀堂鎮江金山  
杭州西湖皆建閣以虔之而前校勘者不謹舛錯脫漏

所在多有文溯閣書尤甚公以是書曠代盛典不可任其疵類乃請自往校之旣而以爲未盡五十七年正月復往會春寒山海關道中冰雪凍沍比至奉天病卒預是書之役者衆矣公獨勤其事而歿可悲也公以文章學業受

特達之知故自四庫全書及通鑑綱目輯覽之外凡契丹國志勝朝殉節諸臣錄唐桂二王本末河源紀略歷代職官表攷奉

勅編輯見付



武英殿刊刻者又二百餘卷每書成或

降旨褒美或交部議敘或

賜文綺筆硯之屬奏進表文多出公手

上閱而益善之故事歲初

重華宮小宴聯句惟

南書房翰林得與焉三十九年奉

旨召入并

賜如意畫軸後以爲常蓋異數也其餘

特賞

年賞

節賞書畫石刻等物不可勝紀奉使衡文累歲不絕充  
山西浙江鄉試副考官者各一充廣東鄉試正考官者  
一充會試同考官者二提督福建學政者一去取精審  
所得多知名士士論益翕然歸之公冲和純粹其色溫  
然其言呐然而穎悟明敏讀書一過無不洞悉貫串少  
時以詞賦入中書中年在詞館賓朋酬贈使節登臨四  
方仰重其名率以絹素來請所作繁富闕溢篋笥顧不  
甚珍惜輒爲人取去自以上蒙

恩遇逾於常格不屑以詞臣自畫晚年益覃心經濟之學常取杜氏通典馬氏通考合以

四

本朝會典如食貨農田鹽漕兵刑諸大政溯其因革審其利弊口講手畫侃侃然可以見諸施行而惜其年之不永是以訃至京師賢士大夫莫不爲之會歆累息者公生於雍正十二年甲寅十二月初二日卒於乾隆五十七年二月二十五日年五十有九世爲江蘇上海縣人諱鳴球者曾祖考也諱瀛齡以選拔貢生官安徽石埭縣教諭者祖也諱秉笏乾隆辛酉科舉人者考也三

代咸以公貴

封贈如其官配朱氏封夫人先公卒以恭順能佐內政  
爲親黨所推子五慶循慶堯慶庚慶勲慶均皆孝友克  
家女五人孫男四人惟松江陸氏世以文章著見公七  
世從祖文裕公深在明宏治嘉靖間以通人名德望重  
臺閣流傳翰墨汔今人寶貴之公官職略與文裕公等  
若其掌著作而被

恩遇有文裕所未逮者且四庫全書定於

乙覽尊於冊府分布於海寓騰今邁古千載未有而皆

公審定而攷正之世之讀提要者見其學術之該博議  
論之純粹顯顯然如在目前所著寶奎堂文集篁村詩  
集雖不盡傳其學可無憾焉已余與公居同郡先後同  
官內閣同直軍機處文酒之會靡不同者輯覽之修余  
先任其事尋以從獵木蘭而公繼之余嘗至上海過公  
竹素堂方池老屋不蔽風雨清修舊德久而彌著然則  
知公之深無逾於予者茲慶循等卜以嘉慶五年十二  
月庚午葬於先塋昭兆奉狀請銘其何忍辭銘曰

魚圻之裔世以文名繫公繼之蔚其魁閎綜裁簡冊以

敝隆平入典書局出主文衡拔諸髦俊用爲國楨七略  
七錄鉅編旣成正厥謬譌往來

神京風饕雪虐卒瘁于征吳淞遼水共此環瀛雲車風  
馬其返邱塋文昌華蓋作作庚庚昭于幽龕後昆之亨

寶奎堂文集原校姓氏

朱朝坤翕菴

黃廷符蓉村

黃廷珍岱雲

黃銘書詠樓

黃巖謙受齋

黃鼎慎菴

趙本東坨

喬淦葆堂

吳敬樞星宰

瞿應紹子野

李丙耀蘇菴

李鍾元硯香

唐國雍吟峯



重刊寶奎堂遺藁全集續校姓氏

章 浩我泉

曹宗瀚嵐樵

朱世琪季廉

張紹英旭棠

程晉佑康侯

沈世功礪山

張孔傳述夫

方 森子維

王象儀芥塘

寶奎堂集目錄

上海陸錫熊耳山撰

卷一

制草 經 進文

孝聖憲皇后諡冊文

和碩誠親王碑文

工部侍郎內大臣三和碑文

封土爾扈特舍楞郡王冊文

封土爾扈特沙喇扣肯貝子誥命文

祭河神文

聖駕恭奉

皇太后南巡頌

謹序

聖駕四詣

盛京恭謁

祖陵禮成恭進樂府

謹序

卷二 經進文 御試文

恭慶

皇上七旬萬壽樂府

擬上壽曲九章

謹序

聖駕五巡江浙恭紀

擬康衢問答辭

誠無爲論

擬爵李躬桓榮詔

擬循古節儉奏

耗羨有無利弊策

卷三 表 劄子

爲王大臣賀

平定緬甸表

爲王大臣賀

平定金川表

爲總裁進

平定準噶爾方略表

爲總裁進

御批通鑑輯覽表

爲在京漢官奏謝開科蠲漕劄子

爲熱河諸生謝設學建廟釋奠落成劄子

爲王大臣謝

賜清文鑑劄子

爲王大臣謝

賜御製詩三集劄子

卷四 劄子

爲王大臣謝

賜日下舊聞考劄子

爲王大臣謝

賜蘭亭八柱帖劄子

爲王大臣謝

賜重刻淳化閣帖劄子

爲總裁進

評鑑闡要劄子

爲總裁進舊五代史劄子

恭進乾隆三十九年

起居注劄子

爲軍機大臣議改定

郊廟行禮儀注劄子

爲總裁擬

進銷毀違礙書劄子

謝授翰林院侍讀



恩劄子

謝授右春坊右庶子

恩劄子

謝授侍讀學士

恩劄子

謝授日講起居注官

恩劄子

謝補光祿寺卿

恩劄子

謝授都察院右副都御史

恩劄子

謝

賜千叟宴詩劄子

卷五

策問

乾隆三十年山西鄉試策問三首

乾隆三十三年浙江鄉試策問四首

乾隆三十五年廣東鄉試策問三首

卷六

示

賦

論

曉諭諸生示

申諭釐剔弊源以重關防以端習尚示

考試古學示

飭禁書寫俗文別字以正小學示

召試觀回人繩伎賦

螭螟賦

觀穫圖賦爲陳碯菴作

二陸論

裴行儉知人論

漢景帝論

石埭少作

唐太宗論

石埭少作

唐武后論

石埭少作

卷七序

山西鄉試錄後序

浙江鄉試錄後序

廣東鄉試錄序

全閩試牘崇雅編序

朗齋吟稿序

蒔花居詩存序

竹濤集序

傷寒論正宗序

補陳壽禮志自序

石埭少作

石埭縣志糾繆自序

石埭少作

卷八

跋

記

啟

書

贊

箴

頌

擬制

李柳溪自記跋

周禮讀本跋

石埭少作

佛龕記爲江畹香作

三元喜讌徵詩啟

擬劉勰以文心雕龍取定沈約書

石埭少作

六世從祖小山先生遺像贊

擬屏箴

有序  
石埭少作

宮保大學士嘉勇福公平臺述績頌

并序

戲擬封橫行介士郭索爲醉鄉侯制

卷九

壽序

祭文

傳

墓誌銘

錢嶼沙師七十壽序

王母吳太夫人八十壽序

孫封翁李太夫人雙壽序

沈太守砥亭六十壽序

李果亭六十壽序

浙江提督喬東齋祭文

張太夫人祭文

湯亮孫傳

石埭少作

喬松老人傳

陶然黃君家傳

喬母張夫人家傳

榮祿大夫都察院左都御史朱公墓誌銘

通議大夫妙正真人龍虎山上清宮四品提點叅

公墓誌銘

節孝汪母王孺人墓誌銘

文林郎婺源縣儒學教諭王公墓誌銘

中憲大夫工部營繕司員外郎朱公墓誌銘

贈奉直大夫太學生古存黃公墓誌銘

贈淑人亡室朱淑人墓誌銘

卷十



炳燭偶鈔二十九條

卷十一 代作

平定兩金川大功告成頌 并序 代袁清恪公作

恭慶

皇上七旬萬壽詩 并序 代阿文成公作

聖駕五巡江浙序 代阿文成公作

御製全韻詩跋 代于文襄公作

乾隆三十六年會試策問一首 代劉文正公作

乾隆三十七年會試策問五首 代劉文定公作

卷十二

代作

光祿大夫贈太保武英殿大學士文襄舒公墓誌

銘

代于文襄公作

光祿大夫贈太子太傅文淵閣大學士文定劉公

墓誌銘

代于文襄公作

光祿大夫贈太子太保戶部尙書文莊王公墓誌

銘

代于文襄公作

榮祿大夫吏部右侍郎加尙書銜恭定吳公墓誌

銘

代于文襄公作

重建慈度菴碑記  
代常州太守金蔣亭作

寶奎堂集卷一

上海陸錫熊耳山撰

制草

敕撰

奉

孝聖憲皇后諡冊文

崇儀告備薦玉策以伸虔

懿行垂光勒瑯函而闡實報劬勞之

厚德禮洽馨聞嚴對越之

鴻名義隆睿作欽惟

皇妣大行皇太后

順體天經

化彰人極

萱庭示範仰宮中之有

聖人瑤甸歸仁臨天下而爲

大母自流徽於京室荷篤慶於藐躬億兆騰歡萃萬方  
爲尊養曾元衍瑞裕

五世以融怡緬

義訓之常昭洵颺言之莫罄賁

鳳綸而賜復澤及葭蓬扶

翟輅以觀民呼兼嵩岱益圖旅賀來庭之鵷鵬駢臻偃  
伯承

禧絕徽之干戈竝戢是皆

慈暉普照覃嶽澥而含和用能

純履康綏儷乾坤而集福憶昨者金泥絢祝十八字疊  
演箕疇冀來茲寶王鐫華億萬齡重增姬算惟愛景情  
殷

顧復依旬之臚頌何窮宜

慈躬祉懋升恆晉冊之揚庥未艾何

升遐之忽邁竟攀慟之難追率土纏悲終天銜恤肇  
尊稱於殷禮念形容無得而名稽上諡於周書極擬議  
於斯爲盛有孝實原有德本百行於地天乃聖卽協乃  
神嫔獨隆於堯舜一詞莫贊敢憑素悃以追慕萬世爲  
公竝詢僉言而咸翕爰遵彝典請命於

天謹奉冊寶上尊諡曰

孝聖慈宣康惠敦和敬天光聖憲皇后於戲溯  
璇闈徽音文行宜特隆冠古之聲頌清廟昌後燕天庶  
稍展崇親之悃伏冀

神靈式安

陟降在茲文琬貽型抒慕誠之罔極彤毫述德荷申錫  
於無疆宏啟嘉符茂昌景祚謹言

和碩誠親王碑文

朕唯天潢襲慶本支之澤方隆藩度貽庥大雅之風可  
溯疇若宗盟之長攸愍冊以非私每懷尊屬之賢勒貞  
珉而有耀惟王端凝叶矩醇謹流褫慧著垂髫  
聖祖洽承歡之愛榮膺疏爵

先皇推同氣之恩憶曾展帙同堂進學常資夫講習越



自剖符就邸睦倫更切乎倚毗典屬籍於宗司望崇瑤  
牒寄分猷於統制政肅牙麾班朝則首率常聯殿上列  
維城之冠巡守而綜襄庶事禁中資留務之勤正茂景  
之承禧祥歌行葦何涼颺之戒節疾問長桑惟時迴蹕  
初聞頻咨攝衛宣醫遍遣期導康綏尙看扶掖來朝想  
夷裊之如昨詎意倉皇臨視愴和藥之空勞爰親奠醑  
以申哀仍舉彝章而錫祕給精鏐於內府薦雕俎於長  
筵節惠攸宜易名曰恪於戲唐叔之封圭宛在誼篤褒  
親河間之塋樹方新情深感逝念昔日詩書起譽嘉儀

表於皇枝信他時金石揚徽荷絲綸於國典式昭令問  
永視豐碑

工部侍郎內大臣三和碑文

朕惟職隆邦事程工嘉式敘之宜榮荷朝章篤蓋勵維  
寅之節領班聯於近陞華髮承恩瞻風采於垂紳丹忱  
效績旣著圭璋之令望宜留琬王之芳聲爾原任內大  
臣工部侍郎三和端謹持躬懋誠宣力光依執戟早充  
宿衛於期門榮溢影纓洊綜勾稽於內省相是材能之  
懋允惟任使之良擢農部而分猷泉刀克裕佐冬官而

董治水土咸平進參正席之班率屬而仍司飭庀再踐  
貳卿之列鐫階而倍凜冰淵履近星辰極品之崇銜復  
晉鞭垂禁籙稀齡之優禮加隆當厯考以彌多宜介禧  
而愈茂工虞居六職之一將永藉夫劬勲康寧爲五福  
之三胡遽嬰夫疾疢閔勞職事願安許就私家軫慮沈  
綿療治救頒珍藥遺章竟告愍綍遄宣陳彤俎以薦馨  
發帑金以歸賄節其壹惠諡以恪勤於戲卅年膺將作  
之司守度克彰於溫樹奕世賁飾終之典崇褒式煥於  
堂封表厥幽阡昭茲來許

封土爾扈特舍楞郡王冊文

寰宇同風殊域凜尊親之戴雲霄布澤天家昭典物之  
隆唯革舊俗以抒忱會其有極斯考彝章而命德奉以  
無私爾舍楞裔本漠陲心依魏闕屬窮荒之暫息遷地  
居難遂合部之偕徠瞻天路近從狩習周法之制班朝  
霑黼黻之光懷我好音爾克自求夫多福復其邦族朕  
唯一視以同仁擇水草而攻駒俾享昇平之樂配方旗  
而建隼永圖生聚之安特建崇班式彰異數茲以冊印  
封爾爲札薩克多羅弼里克圖郡王於戲嘉順節以推

恩庸以示綏懷之禮備藩封而守度尙無忘恭敬之心  
茂對寵光往膺祿位欽哉

封土爾扈特沙喇扣肯貝子誥命文

率土同歸丕著懷柔之略法天廣覆普垂臨照之光臚  
衆志以懷音來王恐後布大公而頒賞與國咸休爾沙  
喇扣肯志切輸忱情殷慕化朔漠庭之自出少克承家  
會朔部之靡寧居思樂宇爰啟闕而請覲迺逐隊以偕  
朝行幄升班慰瞻雲於晝接仙莊涖宴敷湛露於春溫  
體予隆待之優式洽寵綏之典茲封爾爲札薩克悟察

喇爾圖固山貝子錫之誥命於戲訖教協拱辰之義宜  
無替於承恩疏封開奕葉之祥庶有辭於永世是用釐  
爾尙時欽哉

祭河神文

惟

神化治資生功昭濟物溯靈源於九曲懷柔推四瀆之  
宗導遠派於三門利賴徧中州之壤自昨金隄忽潰憐  
下隰之成災因而茭捷頻舉遣重臣以董役屢頒庫錫  
徵材兼及於青徐特發倉儲拯溺倍先於儀考乃鍤雲

之競集績難就夫三冬顧簸浪之仍愬功復虧乎一簣  
籌委輸於引溜移上游而冀底安瀾軫疾苦於窮簷逾  
半載而弗蒙

垂祐撫朕躬而自責慚肝宵之誠意未孚倘

神聽而可回念黎庶之顛連何罪爰舉滎河之典不禁  
迫切以陳辭虔申沈璧之儀唯有屏營而祈助尙邀

靈貺速蕝鉅工

經

進文

聖駕恭奉

皇太后南巡頌

謹序

我

國家受億萬年無疆之祐佑啟

皇帝以神聖文武纘承

列祖庥緒誕保萬民照臨四海遠無弗屆大莫能名

御極以來典學勤政動得理所

孝德昭融

神威遐暢天聲



廟勝犁庭掃闔自累代不賓之地咸入版圖供職貢光  
天之下日出之隅孺乳煦嫗以長以息游於大當厥有  
歲年而

皇帝以如天覆幬之心猶念四海元元若一家子維安  
平太罔不豐雍將俾永永年鑠乎大仁之化不可以不  
省迺

疇咨故事行巡狩之禮東距岱宗南涉嵩洛西抵趙代  
北越塞外所至問疾苦禮高年陳詩納賈同律度量衡  
塞晏駿龐萬世一遇而江淞地斥以廣實庶且繁自我

光前之孝察吏循飢延登三老蒸進髦士披章乙夜儲  
思垂務而民咸廼乎

勅幾之哲

乘輿三幸丕揚

前列登躋極軌靡不宣臻乃至跋行喙息蠓飛蠕動之  
類畢用乂若而民咸諒乎

聖祖

聖孫攬手接武爲生民未有之盛唐哉皇哉茂則上儀  
烏奕顯鏤負絕萬古照耀巍巍臣愚生長

盛世霑被雨露之澤者至深至渥又得從諸父老後恭  
迂

鑾輿親遭逢於百千萬年非常甚盛之典輒抃躍不自  
休謹撰頌十章章十六句以

獻其辭曰

皇帝建極闡繹基命緝熙有光作天然聖大揚

惠言徧照萬姓莖韶協度玉衡齊政宵升

泰壇下管上磬大裘開若昭格神聽

寢門視膳起孝起敬瑤函寶冊用洽大慶

北面師儒攝衣升堂於樂辟靡鼓鐘煌煌禮樂具舉於  
周有光四征不庭撻伐大荒屠耆郅支斧膏其吭流沙  
不毛盡我版章獻其楛矢肅慎來王冠帶侍祠赤狄青  
羌

升中泰山秩望燔柴百神受職靈靈晝開峻極於天嵩  
高崔巍代郡雁門嶺嶺五臺陪京鬱蔥漆沮有邵式是  
四國侯時邁哉招搖前指和鈴喈喈守土臣某奔走偕  
來

帝眷南顧於江之滸包淮絡海維揚州土赫赫明明自

我

烈祖乘輿六駕秋助春補不愆不忘傳次在予予不憚  
勞往錫之祐

玉趾再勤慶典備舉輝山潤川巷有歌舞

鸞旂大輅還歸於

京羣黎慕思如彼孺嬰飛章闔闔達螻蟻誠天門四開  
聽聰視明維歲之故式徐其行母女煩勞以飽女秭其  
棘其紆胥視蒼生地載天壽蕩蕩難名

帝有恩言迺育迺遂不遑啟居哀時之對駕龍十二沃

若六轡期門四羅肅肅萬騎太常婀娜翠葆羽蓋填衢  
父老爭謁掌次虞后五載周十二歲前聖後聖合若符  
契

導自積石黃河走東櫟樞親乘疇若予工宣房瓠子春  
流溶溶鬢之醺之暉於

重瞳方舟濟江波伏無風馮夸前驅魚長龜穹萬靈奔  
走駕梁成虹

天子至止來君來宗

宸章琳瑯照爍巖藪龍蟠鳳逸字大於斗魚鳥咸若卉

木孔有

翠華來思夾道楊柳宛宛婦子壺漿在手福祿之茂

慈聖之壽

皇帝大孝衆拜稽首如岡如陵同天地久

厥土塗泥下下維均我載青旗來惠農人昔頻復稅庾  
積其陳今履青疇晦茁其新勿賦芻蕘飭我虎賁勿撤  
茅茨戒我臣鄰衆拜稽首

皇帝大仁於萬斯年爲天下君

無偏無黨王道正直匪敖匪游求莫孔亟庶民俟來含

和飲德

皇于三狩永惠南國豈惟南國萬邦歸極甄殷陶周光  
我典冊小臣執簡管窺蠡測作爲歌詩垂萬世則

聖駕四詣

盛京恭謁

祖陵禮成恭進樂府謹序

臣聞樂府之作所以述宣功德體視賦頌尤鏗鏘炳耀  
足以震盪耳目漢代有重來上陵二曲爲上陵食舉樂  
府重來辭不傳上陵則惟侈言神怪不稱臚聲纂實之



義臣竊陋焉伏見我

皇上睿聖嗣服

道隆守剗丕冒無外永維

祖

宗肇邦受

命佑啟我家祗被對越三率彝典東謁

闕寢蒸蒸之思夙夜滋虔迺以今歲仲秋時巡

京藩展事

三陵

慕忱齊恪肸蠁昭融還

莅舊都章式剪備

達孝所暨萬禋畢從跨周轅虞無所與讓至於和神誠  
民綏遐勤紀經文緯武所以崇天聲垂軌物有加於昔  
者尙數十事爲奕版策不可殫記

回蹕禮成卿士庶尹百執事胥效賡頌臣愚誠不足揚  
訖萬一而恭逢

嘉會望望之私不敢以輕薄自解輒指事件繫仿古樂  
府譜調別題篇目編爲十二章詞淺義直庶令籥工轅

童皆得諷吟有以發揚

聖天子盛德庥光傳示無極

臣誠懼誠忭拜手稽首謹

上

聖節受釐

山莊發軔良辰協吉順天行也爲壽星明第一

壽星明揆煥黃紛嘉況臨

瑤闈東鵲西鰈咸會稽首上

皇帝千萬歲熙沆碭詹秋期結霽雲砮華芝前驅八神

大丙奉駢

惠迪吉天門開招搖指東之畿肅肅四面歡俟來

蹕路經藩部莅邊門所過鞠脰奉觴歡心允洽也爲柳  
邊青第二

柳邊青青以紆寧寧宰堵坡路轉興中墟和龍左令支  
右別部保塞各各安鄺闔昔甌脫今禾黍

翠葆容與韉紱俠塗齊負弩采椽不斲構

行宇擁篲清塵職守土積蘇衣都曇鼓筵開詐馬旌門  
拜舞

陛下萬年中外主

三陵謁祭備物升馨光

孝思循彝典也爲高山作第三

高山作基庥祥

天祚德九州享淵穆穆

聖重光迪

孝熙寅蒸嘗予有慕眷舊邦鞏

穀林龍蜚鵠展長白襟三江

帝來覲芬蕭薌越閭茂溯尚章歲不居懷秋霜四展祀

昭

皇誠

容有睟優若望榆之樹  
酌幄張石馬馳嘶靈風  
陳廣牡臨齋房舞八溢  
鏗琯鳴

神在天感洋洋承放悲  
歆嘉觴祐

孝孫慶無疆

五朝冊寶奉藏

盛京

太廟對敷

鴻庥昭無極也爲章

神烈第四

章我

神烈於昭于天揚徽熙號玉檢瑤編練吉日格

新廟千祗翊從鸞旂前導芝栴霞拱盤龍琅函瑯几當  
中赤文綠字光熊熊奕世侑

德饗

功日月照耀垂無窮

御盛京

崇政殿受朝遂

錫愷宴大和會也爲

聖當陽第五

聖人當陽

崇政朝百辟仗衛從從得印劔舄

堯階采茨重阿閣德羽集十亭岩帶法會陳函宮吐角  
龢八音沛父老南陽親在鎬愷樂宣

皇仁

朝鮮國王遣使起居

賜詩嘉寵文軌大同也爲平壤朝第六



平壤茶幣朝

天謁者引鄉交閭前使者嗷嗷致辭臣 祗拜表

丹墀

帝嘉守禮

庸作歌樽桑東被

光華多慶尙全羅鯨波泝蕩沾

朝恩咨爾世世奉職修東藩

盛京鼎建

文溯閣分庋四庫全書義符過澗經籍道光也爲水之

瀾第七

水之瀾導崑崙

聖之文繹義軒圖書甲乙丙丁

淵

源

津薈枕三層淮南浙之西波漑褭帟榮幽居臚編

祕閣安三萬六千星摘穎長恩守樞以環列太乙吹藜  
而來下文館崇儒遡冊府

文皇文思

帝稽古東壁揚輝慶繩

武

敕繕治奉天屬城葺工

臨視壯觀瞻固封守也爲屹金郭第八

萬雉屹金郭煌煌衛京雒賦丈給水衡鳴磬喜偕作鐵  
爲壁湯爲池丹雘粉堞蕩蕩開通馗

帝臨省厥成重履視咨周行思難圖易民咸寧不見永  
安極長虹倚疊道

祖澤千春儼穹顙

王迹肇基興懷

祖烈川原諮攬卽事

摘吟

命皇子彙錄函藏闡

光猷式

明訓也爲漢昭回第九

漢昭回

天爲章震耀金石諧宮商經過懷

聖蹟松杏山河長壁壘屯風雲旌旗尙飛揚思

王業

王業多艱難

詩以言志造化迴斡歸毫端

守成慎永圖蒙

庥懌貽安三復豳風篇欽哉永寶以弗諼

咸秩山川崇建祠宇上下

神祇感受職也爲萬靈趨第十

拱

玉鑾萬靈趨視公侯般徐徐句驪東梁相灌輸納嚕皓

旰流英峩鼎祠墀

神之愉周流常羊橫泰河遼東復遼西突兀醫無閭絡  
以大瀛海升香網豫通虛無和風甘雨溟不波

登高樓臨碣石萬里青銅點颿黑

行慶推恩

澤覃豐鎬宏錫類也爲湛露滋第十一

湛露滋萬物各遂生復租稅吏不呼門九年儲無待三  
年耕旗壯差次貸減困粟滿盈校官歌鹿鳴弟子增員  
遊膠庠咸禮讓無所爭雞竿子子視罪輕重弛其刑存

問高年束帛異綬守吏

賜爵一級暨從官下有司書姓名

聖德普福如天葆樸含淳同樂太平

鑾廻戴成格

廟班朝鉅典裔皇

天庥滋至也爲慶

蕃釐第十二

蕃釐來成慶馮馮

昌瑞祇薦百福同

帝車迴杓臨紫宮秉鬯

太室孚

天衷微垣端正開明堂華鐘鏘洋宣八風卿烟八呂曦  
曠曠皇哉

孝治格

祖

宗延洪

純算曼畢嵩光被四海登熙



孫男成沅謹重刊